

Feshahkeek-omehchot Naak-laapkon Ommomektawa

Enchewaatke Feshahkeek-omehchot yaal-yakne  
chokoolekan hashoote eshtoklan ommomektawa. Okon  
motoshchahchon yaamek yakne laapkon apooyooлектawa.

Maamehen, Feshahkeek-omehchot onkakat,  
"Hayatlehchot eełétesh," enkakan, hayatlehchokaaye  
eełomektawa.

Maamehen, Feshahkeek-omehchot maame heechakaaye  
heéłooshesh, aklek heechomektawa. Maamekhook,

motoshchahchokaaye neelakot hochefkoolaàkash;  
maamek, hayatlehchot nehtakot hochefkoolaàkash,  
aklek tonaabaachektawa.

Ophayhyek motooshhayhchek onapakshakan mot  
nehtake enchewatkoktawa.

Maamehen, Feshahkeek-omehchot maamelaàkash, aklek  
tonaabaachen ommeke; okoon ommekeaye takaapaayomen  
ommeke, okoobahchak eelen, lok okelahchon yaknon  
eshtoklan ommekeaye, nehtake eshtooklakaayoktawa.

Feshahkeek-omehchot yan lok enkaktáshkat omen,  
naake yaal-yakne onolfak hootelaàkash,  
Feshahkeek-omehche aklek, tonaabaacheka chołoolehen,  
ahosh, pahosh naak-lápke oolfakan tonaabahen,  
Feshahkeek-omehchokaaye heéłooshen heechektawa.  
Feshahkeek-omehchot naak-laápke ommeke  
tonaabaacheka, mot nehtake eshtocheenakaayoktawa.

Feshahkeek-omehchot yan enkonkaktáshkat omen,  
"Hayatlehchot hashootónton eelelaàkash," ehkakan,  
nehtake eelomektawa.

Maamehen, nehtakon neelakon takaapaakalaàkash,

aklek tonaabaachektáshkat om.

Maamehen, owaachékoohen hashootoohen mamoon  
ommeka hayatlehchoka laápkon yaal-yaknokaaye  
apooyoolomektawa.

Maamehen, Feshahkeek-omehche hayatlehche  
ommekhookoon ommeakaaye hashooton haashon mon  
nehtakokaaye hayatleechelaàkash, aklomaahont;  
maamen, neelakoon ommeakaaye neelak-haashak  
eelalaàkash, aklek mon tonaabaachomektáshkat om.

Maamehen, maamoon ommeakaaye neelakon nehtakon  
eshtoklaakaaye takaapaakalaàkash, aklomaahomet mot  
nehtake eshsheétaahkakaayoktawa.

Maamehen, Feshahkeek-omehchot lok yan  
enkaktáshkat om. "Naak-feshahke laapkot oke  
kaayaoleechekat eelétesh," aklek ommomektawa.

Maamehen, lok foòshon ommomektáshkat om. Foòshe  
yakashleechekaayoon ommeakaaye cheeke anaakaapen  
ohmek, eleeshchek ahookátesh," kaachektawa.  
Feshahkeek-omehchokaaye laa<sup>l</sup>on foòshon eshtoklan  
tonaabaacheakaaye, mot nehtake

eshchahkeepakaayoktawa.

Feshahkeek-omehche yan łok enkaktáškat omesh.  
Nehtake eepankakhooke naak-feshahke naak-laápké  
ommekhooke yaal-yaknon ooyaoleecheepalaàkash, aklek,  
tonaabaachehtawa.

Mahayhmen łok yaaton ommomektawa. Yaaton  
ommomekat, naknon taykon eshtoklan enehnohlaamen  
tonaabaachehtawa.

Maamehen, yaatoochot emeełen, achonkak  
ałalaàkash, naak-feshahkoochak maameh-chaalot  
achonkak omeelaàkash, aklek tonaabaachehtawa.

Maamehen, naake empaahekak entonaabaachek,  
maamehen, mon laápkon tonaabaacheakaaye, nehtake  
eepankakaayoktawa.

Maamehen, naake laapkot tonaabeepakhookan,  
Feshahkeek-omehchot enokeełek feshahkeepan; mon  
nehtake eshkolapankakan naakoka entonaabeepan,  
nehtakokaaye nehtak-honloolaàkash,  
Feshahkeek-omehchot aklomektáškat om.

## Feshahkeek-omehchot Yaataale Enchewaatke Ommektahonka

Ya Feshahkeek-omehche nakne enchewaatke  
ommektahonka, mon Baybe loklaneeyaka mon  
apooneechek, ommaahomeekash hema nehtakoon  
ommekaaye.

Maamehen, nakne ommekhookoon ommekaaye, yaknon  
lokkoshlek ommek, ebon emafeshahkakhookat,

feshahooklomektawa.

Maateh-chaalon ochaape ohmek, mon naknokaaye  
ayyalaàkash, aklek, tonaabaachek ommektáshkat om.  
Ya maamekhookan ahokaaye heeshlooshen  
tonaabaachomaawa. Maamen, tok ehaayakshee  
heeshlooshek eełahen, aklek tonaabaachomaawa.

Ochaape ehtaklakan ahe lokonkakan, łamek  
ehaayon empan ommekaaye, elektahaytelaàkash. Ahe  
łamekan empan ommeka, naake heełtekan naake  
heeshłoshkan yaamehen atashłelaàkash.

Maamekhookan ahe ehaaye enkalekaaye heełakan  
empakat eeheeshłoolaàkash, aklektawa. Maamehen,  
okot shemonaaban ahe ehaayokaaye eełehen,  
shafeshtaylek ommeelaàkash, aklek maamen,  
tonaabaachomaawa.

Maamehen, Feshahkeek-omehchot yan naknokaaye  
ochaapon Eden-kot hochefkoohen, mon ayyak  
ahechaachelaàkash, aklek, tonaabaaachomektawa.

Maamehen, yan ahe ehaayoon ommekaaye shonaabak  
haayahen, ommektawa. Feshahkeek-omehchot yan

Adam-kon kaachonkakak, "Ahe ehaaye  
empeepaachkahokma, ahe eshhachále laameka  
eehaayakan empechkateelaàkash. Empechkan ommeka,  
naak-heeloshkokoolten naak-hampon  
ataalechkalaàkash; empechkan ommekaaye, maamek lok  
chelepaalaàkash," kaachonkaktawa.

Maamehen, naake laapkon ommek  
tonaabaachomehont ommeh-chaak, Adam-kot  
entankeekoktawa. Maamen, Feshakeek-omehchot  
heechakhookat, shentokleekoon ommekaaye taykokaaye  
entonaabaachehtawa.

Maamekhookan, Feshakeek-omehchot nakne  
noochehchek, nakbéshkon lokemehshek taykokaaye mon  
emommomektáshkat om.

Maamehen, taykoon ommekaaye nakbéshkon ohmek,  
maamehen, naknokaaye yan enkonkaktáshkat om, ommek  
tonaabaahoochekhookat, yaate ayyeleesh maameh-  
chaalootomesh. Chanakbéshke laamen lokameeshek  
taykon tonaabaachen, aknakshee aane  
achaknaalootomesh," enkonkaktáshkat om.

Maamektahonkan naknokaaye entáàton  
eewáàche eshtoklakan honhchek enkapahkak aleeeyen  
ommeakaaye, halkon ennákne eshtoklan ommeaka, aknoka  
laamoosheh-choklehpek aleshyaalaàkash,  
aklomektáshkat om.

Ya naknon tayke eshtoklakaayoon ommeaka  
emancheekoka áyteeshchek ommektáshkat omma,  
maameh-chaakaak shemaleefahkeekoka emaytektawa.

8

**GENESIS - KE  
FESHAKKEK-OMEHCHE EMAPONKE  
SHEETAKA  
ONAHAAAYAHLEECHEKAAYOOTOMESH**

**1**

Stories from Genesis

Wycliffe Bible Translators  
September 1985